

四庫全書

史部

欽定四庫全書

平定準噶爾方略前編卷九

康熙六十年夏四月癸巳

命副都統噶錫率赴滇兵還

上諭議政大臣等曰從前令副都統吳納哈噶錫帶領
江寧杭州之滿洲兵二千名前往雲南聽候調遣後
派一千名進征西藏尚有一千名留駐雲南此內已
著武格吳納哈帶領五百名前往守藏其餘五百名

及原議自藏撤回令至成都之一千名今已回滇著
噶錫俱帶回本處

辛亥

議輯烏梁海人衆

征西將軍祁里德等疏言副都統鄂三領兵出
烏蘭古木汛界收撫烏梁海部人甚衆議政大
臣等議曰烏梁海人並於所在遊牧今閒處軍
中不便當送至巴顏珠爾克安置再兩路將軍

去年師旋未以策妄阿喇布坦消息報知今年
進取吐魯番探聽賊人消息尤要乘此雪消草
長時宜令官兵收復烏梁海散亡之衆更於汎
界偵探機宜奏入

上從之

庚申

平逆將軍宗室延信以病還京

命定西將軍噶爾弼率兵駐藏

延信疏言遵

旨辦理事竣還至中途病劇不能赴藏駐防議政大臣
等議曰請調延信還京師令署四川總督噶爾
弼於年羹堯還任之日仍受定西將軍印敕統
兵赴藏駐守仍以都統武格叅贊奏入

上從之

五月壬戌

命撫遠大將軍允禩統兵移駐甘州

允禩疏言方今駐劄巴里坤兵進取吐魯番策
妄阿喇布坦部人必震恐以漸來歸但甘州肅
州等處滿洲綠旗兵悉調赴巴里坤臣所統兵
宜進甘州肅州駐劄聲援議政大臣等議曰肅
州地狹甘州稍廣濶當令大將軍允禩統領現
在西寧兵赴甘州駐劄經理調遣機宜西寧地
亦扼要宜遣大臣一人駐劄奏入得

旨依議著大將軍允禩派一要緊大臣駐劄西寧管理

甲子

靖逆將軍富寧安奏請駐兵於伊勒布爾和碩
富寧安疏言奉

旨令臣駐兵烏蘭烏蘇進取吐魯番更令臣定議具奏
伏思烏蘭烏蘇地狹小難駐大兵惟伊勒布爾
和碩地去烏蘭烏蘇百餘里水草既佳有險要
可據薩爾海又為通吐魯番路高處可以瞭遠
當於其地駐兵馬匹需用者留之餘馬悉於烏

蘭烏蘇色畢特地界令官兵牧放至進取吐魯
番兵當如議政大臣所議選七千人但今已議
於阿爾台路撥兵三千至巴里坤如有機會可
自吐魯番進勦請更於阿爾台所撥兵增一千
人計兵八千令散秩大臣阿喇衲及提督路振聲
統之進取吐魯番更令率京城兵副都統一
人率阿爾台兵大臣一人西安副都統及總兵
官現住巴里坤者各一人同往並令阿喇衲統

轄奏入

上從之

戊寅

命諸路暫停進兵

上諭議政大臣等曰從前議欲今年大兵進勦後經議政大臣等議進取吐魯番扼其要地再偵探策妄阿喇布坦實信相機而行已行文大將軍允禩及三路將軍近據大將軍允禩密奏以軍務重大欲俟明年

進兵朕意亦如此今年大兵著暫停進勦其進取吐
魯番扼住要地之處俱著停止行文各路將軍將器
械馬匹口糧諸務俱令預備整齊俟來年進兵其間
如有可乘之機富寧安駐兵之處相近著即酌量而
行

甲申

以侍讀學士常授為理藩院額外侍郎駐西寧
撫遠大將軍允禩疏言奉

旨令大臣一人駐劄西寧辦事查西安將軍宗扎卜嘗
調駐西寧又侍讀學士常授任青海事有年可
否令其駐劄奏入得

旨常授著授理藩院額外侍郎駐劄西寧辦事宗扎卜
著赴大將軍允禩處聽候調遣

乙酉

以年羹堯為陝西四川總督

上諭大學士等曰陝西總督鄂海著辦理軍前糧餉四

川總督年羹堯著兼理四川陝西總督事務原任侍郎革職色爾圖著署理四川巡撫事務皆馳驛速行赴任

庚寅

命調黑龍江吉林新滿洲索倫達呼里兵及和托輝特喀爾喀烏梁海各台吉貝勒兵赴軍前

上諭議政大臣等曰大將軍允禩明年欲行進兵或今年冬季策妄阿喇布坦處廢敗事出有機會可乘亦

未可定應令副都統穆克登將黑龍江吉林之新滿洲索倫達呼里官兵揀選五百名和托輝特公博貝之弟台吉圖巴於伊兵內酌量派出幾人再喀爾喀貝勒丹津多爾濟揀選伊屬下兵丁烏梁海扎薩克台吉托穆克帶伊屬下兵丁俱赴巴里坤軍前預備調遣著速議具奏尋議黑龍江吉林之新滿洲索倫達呼里官兵當令穆克登統領進發喀爾喀兵當令貝勒丹津多爾濟統領進發奏入

上從之

甲午

居烏梁海降人於巴顏珠爾克

征西將軍祁里德等疏言新撫烏梁海二千五百三十一人應以滿洲兵三百喀爾喀兵二百送至巴顏珠爾克居之更於車臣汗等旗所統兵選三百以台吉一人副台吉二人同駐防守議政大臣等議如所奏奏入

上從之

六月丙申

封平逆將軍延信為輔國公

上諭宗人府曰平逆將軍延信朕親伯之孫朕之姪也此番統領滿洲蒙古綠旗兵丁過自古未到之烟瘴惡水無人居住之絕域殲滅醜類平定藏地允稱不辱宗支克展勇略深屬可嘉著封為輔國公

撥涼州披甲者駐西寧

撫遠大將軍允禔疏言臣今赴甘州率西寧兵
往請調滿洲兵自西寧進藏還者赴西寧駐劄
議政大臣等議曰滿洲官兵自西寧隨平逆將
軍延信進藏還者前已奉

諭旨令還京師請撥駐劄涼州喂馬披甲者數百人於
西寧駐劄即令侍郎常授管轄奏入

上從之

壬子

以覺羅伊禮布署西安將軍

西安將軍宗扎卜疏言臣遵

旨赴撫遠大將軍允禪軍但今西安左翼滿洲副都統
常壽漢軍副都統鄧奇章悉在巴里坤軍前右
翼滿洲副都統缺未補漢軍副都統班岱老病
請遣大臣一人赴西安署將軍印務議政大臣
等議曰西安右翼滿洲副都統缺已授駐劄西
寧副都統覺羅伊禮布應以將軍印令伊禮布

署理班岱老病應令還京奏入

上從之

乙卯

命靖逆將軍富寧安收撫吐魯番

先是富寧安疏言吐魯番歸附回人阿喇卜坦等訴言各城潛藏回人約五百餘悉願歸誠宜即派兵收撫但他哈爾齊哈喇沙爾諸處與吐魯番近聞大兵到回人必悉欲歸誠不得不派

兵防守而輓運糧餉甚難以此尚未發兵收撫
奏入報

聞至是又奏吐魯番回人阿里木和卓等訴言策妄阿
喇布坦將衆回人遷赴哈喇沙爾回人相率逃
歸準噶爾之人來追回人併力擊退之現駐魯
克察共議以托克托瑪木特等為首令我等祈
請速為救援臣等議衆回人景慕德化悉願來
歸當即遣兵收納但策妄阿喇布坦未滅將吐

魯番回人收納勢必屯兵守護恐糧運艱難尚未遣兵收納奏入

上諭議政大臣等曰據富寧安奏稱策妄阿喇布坦將吐魯番回人托克托瑪木特等遷往哈喇沙爾地方中途逃回在魯克察地方駐劄等語現今歸順之回人與準噶爾之人爭鬪將準噶爾之人殺害取甲來獻觀此情形策妄阿喇布坦似略無報復之意或伊同黨內有不睦亦未可定此機不可輕失朕意策妄

阿喇布坦將伊等不能遷往哈喇沙爾又不能護衛
準噶爾之人足見萬不能敵我兵今收復吐魯番若
不看守則策妄阿喇布坦處歸順之人以及來使逃
人有回人居中倘行殺掠此路必致阻隔爾等速議
行文富寧安派綠旗兵一千名察哈爾厄魯特蒙古
回兵一千名前赴吐魯番收納歸降回人照看駐劄
將歸順之人及來使逃人往內解送之處牢設哨汛
今回人歸降於我與厄魯特世成仇敵即係我民其

巴里坤相距吐魯番止六百里為途不遠如果策妄
阿喇布坦率衆侵擾我兵前去救援不遲著富寧安
預行轉飭回人等於我軍尚未抵境之時若有策妄
阿喇布坦處來使逃人萬勿隱匿侵犯即行解送著
議奏尋議回人頭目托克托瑪木特等來歸當遣兵
防護行文富寧安等遵

諭旨行至蒙古回兵令輝特公巴濟率往察哈爾兵以
巴爾虎侍衛阿玉錫為副都統與侍衛克什圖

同率往綠旗馬步兵令富寧安選派總兵官一人率往更令散秩大臣阿喇衲統轄同往所需兵糧如何輓運令富寧安等酌議行奏入

上從之又

諭議政大臣等曰得今年歸順之厄魯特回子之信及西邊歸順之厄魯特信息知從前策妄阿喇布坦地方甚是震動但去冬至今策妄阿喇布坦移駐伊犁地方未得確信倘策妄阿喇布坦處果有變亂機會

斷不可失著行文將軍富寧安傳爾丹祁里德等用心偵探確實信息具奏

臣等謹按逋寇將殄其與必孤譬木之就稿則枝葉零落先之唐不受悉怛謀降竟以委敵失策甚矣吐魯番地近巴里坤為準噶爾部來使必經之路今傾慕

聖化率先內附此足徵準噶爾之殘暴不能撫衆也是時任事諸臣有以調兵輓餉為慮者賴我

聖祖仁皇帝睿謨內斷燭照幾先遂撫其衆且護以兵
準噶爾瓦解之勢已基於此我

皇上因策凌策凌烏巴什等來歸即予收納撫順討

逆

神機默運威行絕域用能殄數十年之逋寇而諸蕃

綏靖跡接響臻所以閔紹

前猷垂光萬禩後先一揆何其盛歟

庚辰

遣兵救護歸順回衆

撫遠大將軍允禩疏言據靖逆將軍富寧安呈
報和勒博斯額穆齊宰桑率五百厄魯特兵將
回人圍困彼此互有殺傷若遣兵救援厄魯特
勢必逃竄回人必乞留兵護守但留兵少則無
益於事多則糧運艱難不留兵則魯克察克有
回人萬餘勢必隨入內地不收撫則旋師後恐
厄魯特乘之欲收撫又恐無以資口食屯駐哈

密則地狹小扎薩克額敏亦不能收卹移至布
隆吉爾達里圖各處安置則戈壁難行需糧亦
多以此籌畫再四未即救援臣即檄行富寧安
云收撫回人事蒙

皇上睿鑒令發兵二千赴吐魯番

諭旨到即派兵速往視形勢要隘設汛哨嚴防守至輓

運糧米巡撫綽奇已任其事議政大臣等議曰

當如所奏更令統領官兵散秩大臣阿喇衲以

所得消息報富寧安有當救援之處令富寧安酌行奏入

上從之尋富寧安疏云臣遵

旨派兵二千防守吐魯番令散秩大臣阿喇衲率往又烏蘭烏蘇以內有科舍圖色畢特各處為赴吐魯番隘口且與戈壁聯界臣專派署前鋒統領法璫等率兵一千據守要害又恐賊衆由戈壁後路來襲法璫等屯兵則科舍圖以內有地曰

鄂隆吉亦為扼要當於鄂隆吉設哨兵二百令
侍衛哲爾德率往議政大臣等議如所奏奏入
上從之

辛丑

命副都統穆克登貝勒丹津多爾濟率兵五百名赴巴
里坤軍前叅贊軍務

九月辛卯

命簡撤各營官兵

上諭議政大臣等曰各路隨征兵丁內有殘疾年老者
虛耗糧餉無濟軍務應行文大將軍將軍等查明撤
回并令派官管領回兵之時勿致沿途生事富寧安
尋奏於巴里坤官兵內查出年老病廢不能効
力者官七人護軍披甲二百二十五名察哈爾
兵一百八十名即於其中官員內簡派管轄遣
還至吐魯番科舍圖鄂隆吉各處及巴里坤留
駐兵共二萬一千一百其遣還兵缺可以不補

議政大臣等議如所請奏入

上從之又祁里德疏奏遣還軍中年老病廢之人得

旨軍中年老病廢之人著查明遣回副都統巴勒年老

亦令回京其在軍中亡故之人骸骨著送回各原籍

埋葬尋都統圖喇等奏吉林署營總齊理布等四十

五人兵五百七十二名及自以資斧赴軍効力

藍領侍衛綽爾海等二人當遣還其官兵缺俾

補奏入

上從之

甲午

以公策旺諾爾布代噶爾弼為定西將軍赴藏
四川陝西總督年羹堯疏言定西將軍噶爾弼
率兵赴藏至瀘定橋病不能進奏入得

旨噶爾弼患病調養尚需時日其將軍印著齎付公策
旺諾爾布署理額駙阿寶都統武格俱著叅贊軍務
戊戌

命大將軍允禔靖逆將軍富寧安等進守吐魯番

征西將軍祁里德疏言遵

旨令叅贊副都統鄂三派遣官兵往阿爾台哈道里各處遇厄魯特烏梁海之人即為擒之探得消息亦即馳報又遣和托輝特公博貝所屬察胡賴等往洪郭壘哈撒勒扎爾圖喇各處探取策妄阿喇布坦消息據叅贊副都統鄂三所遣官兵還報前路哨探絕無行人踪跡據察胡賴等還

報云詢洪郭壘哈撒勒扎爾圖喇居人言策妄
阿喇布坦已死子噶爾丹策零收取部下之厄
魯特及居於阿爾台之烏梁海等不知遷徙何
處臣復遣察胡賴等往探如得實即行文將軍
富寧安傅爾丹等同率大兵乘機進勦疏入

上諭議政大臣等曰上年策妄阿喇布坦將伊邊界之
人收去又將吐魯番回人移往哈喇沙爾其阿爾台
烏魯木齊等處無一哨汛因其寂然以處遂有策妄

阿喇布坦身死之信然不可據以為實也覽將軍祁里德奏策妄阿喇布坦若果身死則機不可失請預備進兵爾等行文大將軍及靖逆將軍富寧安等今歲將吐魯番堅守為要又阿爾台吐魯番一帶汎地均宜加意防守冬令雪降草枯之際不可貪功輕進且將兵丁馬匹一應什物整齊備辦以俟來年大舉征勦此旨著即行抄錄傳諭軍前大臣等知之

庚子

命靖逆將軍富寧安進兵伊勒布爾和碩

先是

上諭議政大臣等曰阿喇衲看守吐魯番地方恐兵勢單弱應行文將軍富寧安酌派官兵遣往吐魯番駐劄至是富寧安疏言臣奉

諭旨派兵二千令副都統莊圖率領於八月十六日啟行赴吐魯番今又派兵二千令副都統穆克登等率領於九月初三日啟行赴吐魯番昨據散

秋大臣阿喇衲報云十月雨雪之際擬乘賊無
備進兵襲擊雖吐魯番兵勢不弱但恐賊兵乘
我軍後請親率兵四千進駐伊勒布爾和碩調
遣策應巴里坤留兵三千請令都統睦森率領
奏入得

旨令議政大臣等議奏尋議應如所請但今冬雨雪時
祇可就近地襲擊不宜深入奏入

上從之

戊申

增給在營兵官羊

靖逆將軍富寧安疏言康熙五十七年

皇上恩賚巴里坤官兵羊七萬隻經進兵襲擊及派兵
吐魯番諸處撥用之外存羊二萬餘今吐魯番
屯駐官兵宜續運口糧每石需運費銀幾三十
兩若以一羊抵米一斗值止一兩五錢而解送
尤易請再撥官羊數萬送巴里坤軍前不惟吐

魯番諸處軍餉羊米兼給省費甚多即於來年
進勦軍儲亦有益議政大臣等議如所請奏入
上從之

癸丑

靖逆將軍富寧安奏報敗賊於吐魯番

富寧安奏言據散秩大臣阿喇衲報九月初八
日探知策妄阿喇布坦遣人犯吐魯番城即派
侍衛克什圖等率兵迎戰阿喇衲親率官兵尾

其後至中途見賊二千餘人與克什圖兵列陣
交戰遂以所領策應兵分為三隊奮勇衝擊賊
不能敵敗入林中官兵追勦入林賊復棄騎步
戰我師鎗礮齊發擒殺賊百餘人獲軍械馬匹
無算賊衆奔逃我師追捕數十里因時已薄暮
不便深入乃派公巴濟等率兵五百伏林中偵
探防守餘兵撤還伏思吐魯番地恐賊人窺伺
已先奉

旨添兵駐劄今果如

聖算奏捷請於科舍圖駐劄處更增兵五百鄂隆吉駐
劄處增兵三百防賊人由戈壁犯我哨汛且科
舍圖鄂隆吉地近阿爾台有事接應調遣尤便
又前以阿喇衲報今冬雨雪時欲進兵襲擊故
疏請移駐伊勒布爾和碩為之聲援今賊人敗
潰盡知我師在吐魯番諸處其邊境必懼而防
守未可襲擊阿喇衲兵今冬宜姑緩勿進臣仍

統兵駐巴里坤俟來年大舉進勦議政大臣等
議如所奏奏入

上從之

丁巳

詔立碑西藏

蒙古王貝勒貝子公台吉及土伯特酋長等奏
西藏平定請於招地建立豐碑以紀盛烈昭垂
萬世

上允所請

御製碑文曰昔者

太宗文皇帝崇德七年班禪額爾德尼達賴喇嘛顧實
汗謂東土有

聖人出特遣使自人跡不至之區經仇敵之國閱數年
始達盛京至今八十載同行善事俱為施主頗極安
寧後達賴喇嘛之歿第巴隱匿不奏者十有六年任
意妄行拉藏滅之復興其法因而允從拉藏青海羣

衆公同之請中間策妄阿喇布坦妄生事端動準噶爾之衆肆行奸詐滅壞達賴喇嘛并廢第五輩達賴之塔辱巖班禪毀壞寺廟殺戮喇嘛名為興法而實滅之且欲竊據土伯特國朕以其所為非法爰命皇子為大將軍又遣朕子孫等調發滿洲蒙古綠旗兵各數萬歷烟瘴之地士馬安然而至賊衆三次乘夜盜營我兵奮力擊殺賊皆喪胆遠遁一矢不發平定西藏振興法教賜今瑚畢勒罕冊印封為第六輩達

賴喇嘛安置禪榻撫綏土伯特僧俗人衆各復生業
於是文武臣工咸謂王師西討厯瘴癘險遠之區曾
未半載輒建殊勲實從古所未有而諸蒙古部落及
土伯特酋長亦合詞奏曰皇帝勇畧神武超越往代
天兵所臨邪魔掃蕩復興蒙古向所尊奉法教坎麻
藏衛等部人衆咸得拔離湯火樂土安居如此盛德
大業非臣下頌揚所能宣罄請賜御製碑文鐫勒招
地以垂永久朕何功焉而羣衆勤請不已爰紀斯文

立石西藏俾中外知達賴喇嘛等三朝恭順之誠諸
部落累世崇奉法教之意朕之此舉所以除逆撫順
綏衆興教云爾

議勦郭羅克番

駐劄西藏額駙阿寶報青海索羅木之西有郭
羅克部落唐古忒等肆行劫掠往來行旅曾盜
駐劄索羅木兵馬匹郭羅克與內附之多隆汗
地相近當檄令多隆汗宣示之令遵守法度毋

復肆橫倘不遵戒約請即以兵懲其首惡令多
隆汗於部內選才能者使領郭羅克衆則西寧
青海諸處來使及商販俱稱便議政大臣等議
如所請奏入得

旨額駙阿寶請將郭羅克部落懲治所言甚當郭羅克
地方近四川松潘一路與多隆汗接壤應行文總督
年羹堯提督岳鍾琪等著向多隆汗處詳詢郭羅克
地方形勢若何發兵進剿用力幾何如易於攻取即

令岳鍾琪帶領松潘兵進勦倘地險勢衆應酌量派
遣滿洲蒙古兵丁及附近之察罕丹津處亦令派兵
協助前往進勦著大將軍允禔侍郎常授總督年羹
堯提督岳鍾琪會同定議而行尋年羹堯疏言郭羅
克各寨有隘口三悉險峻宜步不宜騎若調兵
多則邊外聞之賊得潛為備不如以番攻番酌
遣官兵率領為便臣素知近郭羅克如雜谷諸
處土司土目亦病其肆惡願以兵助勦臣與岳

鍾琪議遣官與雜谷土司等約適額駙阿寶移
文奉

旨命臣與岳鍾琪酌議進勦機宜臣即移提臣令速赴
松潘選領鎮兵及督率土兵進發議政大臣等
議如所請奏入

上從之

冬十月丙寅

命理藩院侍郎常授甘肅按察使巴襲管理西寧柴達

木諸處軍餉事務

撫遠大將軍允禔奏請赴京

許之

撫遠大將軍允禔疏言賊厄魯特侵犯吐魯番
為我兵所敗鼠竄而去來年當大舉翦滅請容
輕騎赴京請

訓旨議政大臣議如所請奏入得

旨大將軍允禔令其來京將印交與平郡王訥爾素此

際若策妄阿喇布坦屬下有自相離潰率衆來歸者
則大將軍停止來京可速赴肅州將軍祁里德亦令
來京將印交與都統圖喇將軍傅爾丹軍前之前鋒
統領丁壽護軍統領覺羅涂喇亦令將伊等事務交
明來京將軍富寧安亦令於軍中派一可托大臣來
京俱於年內到京以便指示來年大舉進勦方略

戊辰

運河南湖廣米豆赴甘州涼州

辦理糧餉事陝西總督鄂海疏言遵

旨至甘州料理糧餉甘州各處山多田少所獲糧草無
幾不得不為多備今河南湖廣糧已運至陝西
請於其中撥米六萬石豌豆四萬石以其半送
甘州半送涼州如豌豆不足即以米抵之議政
大臣等議如所請奏入

上從之

乙亥

增墾烏蘭古木地

征西將軍祁里德疏言於今春三月遣官兵在
烏蘭古木之特里河邊耕種每麥種一斗收麥
二石有餘烏蘭古木地煖土肥請於來年多墾
之可望大收所收糧用駝自特里運至烏巴薩
池更以過渡小船由特里河至營費省而於餉
有益議政大臣等議如所請奏入

上從之

十一月壬辰

命原任總督額倫特侍衛色楞副都統查禮渾等世職
准予承襲兼議卹提督康泰等

上諭大學士等曰原任總督額倫特侍衛色楞副都統
查禮渾皆陣亡伊等世職俱著承襲又陣亡提督康
泰總兵官康海司九經俱著議敘伊等有世職亦著
承襲西安佐領扎木素漢仗好在軍中頗出力索倫
藍翎扎倫察漢仗好交戰時頗勇猛射死數賊身受

重傷自盡俱著交部議敘

十二月壬申

四川提督岳鍾琪奏平郭羅克番

岳鍾琪疏言勦撫郭羅克番已平得

旨據岳鍾琪奏賊番伏兵千餘突出對敵被我土兵連
敗數陣逃奔過河復攻取下郭羅克之吉宜卡等二
十一寨殺死賊番甚多連夜進兵直抵中郭羅克之
納務等寨賊番猶敢對敵我兵奮不顧身自殲至酉

連克一十九寨斬殺三百餘人擒獲賊首酸塔爾榜
索布六戈復親督官兵抵上郭羅克之押六等寨正
欲攻取該寨頭目旦增等將首惡假磔併為從格羅
等二十二名綁縛獻出率領闔寨男婦老幼叩頭乞
命只將為從賊番盡行正法首惡酸塔爾榜索布六
戈假磔解送等語殊屬可嘉在事官兵著議敘具奏

癸未

命陝西總督鄂海按察使永泰赴吐魯番墾地

上諭議政大臣等曰吐魯番現駐官兵其可種之地甚多總督鄂海按察使永泰在大將軍處無甚事務著前往吐魯番地方種地効力議政大臣等奏鄂海管理理甘州糧餉今往種地糧餉事請令綽奇管理奏入

上從之

平定準噶爾方略前編卷九

欽定四庫全書

平定準噶爾方略前編卷十

康熙六十一年春正月庚子

命齋諭哲卜尊丹巴胡土克圖暫停進兵

上諭議政大臣等曰策妄阿喇布坦之兵屢被我師擊
敗死傷頗多策零敦多卜等賊衆亦大半死亡棄藏
竄走仍回伊犁地方固守三嶺若我滿洲兵至則舍
命交戰勢有不敵又思逃避他所希圖存活此等情

形瞭然可睹朕數日來細加尋繹伊犁山蹊險隘我朝大兵雖欲今年進勦倘為三嶺阻隔遲延時日或策妄阿喇布坦戰敗帶領妻子逃往則我師應否追勦不可不詳加定議今策妄阿喇布坦之伎倆悉已深知策妄阿喇布坦亦稔知天朝兵威所加勢必不能自存但此時遽遣使向策妄阿喇布坦處招撫彼不知我寬仁之意反以為不能取彼復生他心亦未可定爾等可議寫發往策妄阿喇布坦之書著哲卜

尊丹巴胡土克圖選派好喇嘛為使作速差往其差
往之人過阿濟嶺由吐魯番一路前往不久可到
彼處信息情形亦即得聞知如胡土克圖之使者善
為曉諭策妄阿喇布坦畏懼天討將拉藏妻子家屬
并從前被擄之人送來請罪誠心投順永不敢侵犯
邊隅如此可另行商酌倘策妄阿喇布坦已死或伊
處內變生亂除向天朝投奔外彼將焉往則我兵進
發亦不可緩即一面進兵一面差使亦無耽擱之處

今各路兵丁或向伊犁前進或於吐魯番固守漸近
烏魯木齊等處駐劄營寨相機而行或幾路前往襲
擊以及大兵糧餉作何運到之處著議政大臣軍前
調回將軍大臣會同核議妥確具奏尋議曰將齊

諭胡土克圖發往策妄阿喇布坦書呈

覽令胡土克圖選派喇嘛齋往且覘其消息果誠心歸
順即馳報駐劄吐魯番協理將軍阿喇衲相機
行事似宜暫緩進兵伊犁至於吐魯番駐兵固

守或進烏魯木齊等處立營駐劄請令將軍富
寧安阿喇衲等遵行並將牧放牲畜耕種地畝
修造城池及巡防汛界輓運糧餉之事詳議入
奏但自吐魯番往哈喇沙爾取道有二或沙漠
水少或山巒險隘若進兵襲擊需兵幾何糧餉
輓運若何亦令富寧安阿喇衲等議奏今駐巴
里坤綠旗步兵五千當發吐魯番築城種地駐
防令即啓行其軍糧農器令將軍富寧安總督

年羹堯巡撫綽奇辦理奏入得

旨依議其向伊犁進兵之事議令暫停姑待機會行事
此議甚是其綠旗步兵五千名議令發往吐魯番亦
甚是巴里坤距吐魯番不遠催趲行走六七日可到
但綠旗兵丁每二人共馱馬一匹所馱乾糧俱於此
馬馱載若有倒斃勢必用他馬分馱惟恐負重以致
馬匹多損漢人不能喂養馬匹著將此綠旗兵丁乾
糧俱於官馬馱載另分隊伍令人管轄輓送再交與

哲卜尊丹巴胡土克圖發往策妄阿喇布坦之書詞
句稍繁俟朕刪改發往

庚戌

命侍郎敦稗都統圖思海等輓運軍餉

敦稗等疏言去年七月都統圖思海等運到米
撥給布魯爾一路之外其布拉罕一路存糧尚
足支一年但路遠軍儲宜預又接都統圖思海
文云前運糧至郭多里巴勒噶遜曾以喀爾喀

駝接換馱載運至察罕廐爾諸處但來年輓運
更多請以大同宣府飼養之駝增給更換令都
統圖思海等以糧運至察罕廐爾後駝乃送還
大同宣府牧養議政大臣等議如所請奏入得
旨軍前運送米糧係敦稗薩哈布圖思海公同之事今
敦稗薩哈布在彼處無事著調回與圖思海等一同
輓運彼此看管運至察罕廐爾將軍處交納其帶回
駝隻公同看管送至大同宣府交納處再往軍前

二月壬申

命詳議協理將軍阿喇衲征西將軍祁里德所奏軍事
阿喇衲疏言臣等遵奉

諭旨將賊人形勢難易之處密奏臣觀賊人進退雖熟
踪跡甚輕雖有烏鎗鉛藥甚少我兵鎗礮悉
備鉛藥充裕此勝賊者一也賊人雖有鎗戟少弓
箭我兵鋒刃鋤利弓馬強勁此勝賊者二也賊
衆臨陣易敗惟恃乘隙侵掠我兵部伍整齊無

間可乘此勝賊者三也賊衆以乘夜盜馬為得計我兵有備彼不能入此勝賊者四也賊衆遊牧我地似若便易我兵一至輒為妻子牲畜所累狼狽相顧不能一心迎戰此勝賊者五也從此直至伊犁搗其巢穴掃蕩匪難惟是賊入路徑處處可通我駐兵後路賊來一夕可到我兵遠設汛界或被攔截反致消息阻隔即今所種吐魯番地畝亦須防其侵擾今大兵或前移烏

魯木齊駐劄臣等亦前移吐魯番布列近地駐
劄彼此接應既可斷賊人潛襲之路而屯地亦
無虞侵擾謹以勘丈吐魯番相近地形繪圖呈
覽為進兵計可分為三路阿爾台一路由科卜多沿河
越額爾齊斯河進發巴里坤一路由烏魯木齊
進發吐魯番兵由阿勒揮口越那拉特嶺進發
每路可用兵一萬五千賊若三路來迎則勢分
易敗若一路來迎則我以一路兵與戰以兩路

兵直抵其妻子屯駐之地彼必不能兼顧且其所恃為阻隘者三嶺然可步而上非若棧道之險也彼所恃以資生者牛羊與乳若悉衆聚於一地水草無多牲畜易盡勢必入自謀食紛紛離散既散之後不能復聚乘此勦滅之其勢甚易但時日未可預定軍糧亦宜預籌今歲吐魯番墾種之地不能多穫若米糧未即運到不若暫以諸路兵撤至哈密阿爾台新城駐劄聚積

軍糧操演兵力俟賊人內變勦滅似於國帑民
力悉便又祁里德疏言策妄阿喇布坦逞虛
妄之詞集烏合之衆天兵一至勢必瓦解鼠竄
若我兵如前整備調集士馬持四月糧由吐魯
番烏魯木齊瞿爾山前山後四路約期同進則
軍威震疊彼必不能支或即歸順或各逃亡策
妄阿喇布坦無計遠遁若竄入阿拉克山必成
擒矣倘以伊犁路遠我兵尚煩跋涉姑俟其內變

乘機進取請以阿爾台兩路兵前移伊勒布爾
和碩地會巴里坤兵秣馬裹糧駐劄以待又或
以賊入竄處窮邊暫停天討以卹生靈請於駐
兵處整肅兵馬墾種地畝為久駐計奏入得

旨令議政大臣議奏尋議協理將軍阿喇衲陳奏甚詳
能得肯綮將軍祁里德所見相同但近日哲卜
尊丹巴胡土克圖既遣使往策妄阿喇布坦當
俟其還報定奪至大兵前移烏魯木齊堅立營

寨修城種地可否駐劄防守令將軍富寧安阿喇衮速議入奏其阿爾台一軍今年在伊勒布爾和碩牧養馬匹俟來年由烏魯木齊分四路進發當如祁里德奏行奏入得

旨令在京議政大臣會議尋議曰將軍阿喇衮祁里德所奏與扈從諸王大臣所議甚詳今吐魯番駐兵種地多積米糧悉關機要蒙

恩賜給吐魯番種地人牛羊又令哈密回人一同墾種

尤於軍糧有益惟所墾之地或恐策妄阿喇布坦潛來侵犯宜嚴防守請令將軍阿喇納等酌留馬兵以資捍禦兼備擒勦奏入

上諭議政大臣等曰今年大兵前進駐劄烏魯木齊地方爾等僉慮米糧不能接濟或致遲悞彼時撤兵不可駐兵不可似有煩難之處朕亦慮及但我兵預備數載去年曾議進兵而竟不果今年若再駐劄不進則策妄阿喇布坦得以休息一年從此或生他志不

如乘此預備之兵仍照從前令阿爾台巴里坤兩路
兵丁照常襲擊前進至烏魯木齊地方兩兵會合
如策妄阿喇布坦果有兵來正可勦滅若畏懼不敢
前來即將我兵收回各往本處駐劄如此每年襲擊驚
擾賊衆彼或生內變亦未可定爾等會同酌議具奏
尋議巴里坤一軍由烏魯木齊進勦路近往返
甚便阿爾台一軍亦進至烏魯木齊其間沙漠
間隔二千餘里路遠往返較遲況賊衆偵知我

兵克取吐魯番悉竄匿伊犁俟其內變統兵進
取策尤便至一切糧馬事宜已令將軍富寧安
等查明定議請俟奏至再議奏入得

旨我兵連年預備若今年進兵甚屬從容今爾等既稱
口糧可慮著依議行

夏四月

議設兵屯田於布隆吉爾

靖逆將軍富寧安疏言嘉峪關外布隆吉爾之

西古瓜州沙州燉煌郡地也昔曾建築城池屯
兵耕種今舊址尚存土廣可牧馬且有河水若
於此屯田駐綠旗兵三四千設總兵官一人統
之可扼通黨色爾騰之路而於諸處調遣悉便
議政大臣等議曰請令將軍富寧安總督年羹
堯提督路振聲定議入奏奏入

上從之

己巳

命撫遠大將軍允禴復往軍前先是允禴於康熙五十七年十一月由軍前至京至是遵

旨復往

五月癸巳

議給吐魯番軍糧

靖逆將軍富寧安疏言接部文今歲大兵移駐烏魯木齊糧馬牲畜備否來年大兵進勦糧馬牲畜能接濟否發往阿爾台官兵一萬二千及

從人自十月起支軍糧如不足供當如何增運
令與總督年羹堯巡撫綽奇定議入奏按康熙
五十四五兩年臣在肅州辦餉月給官兵之外
又備進勦裏糧二萬一千餘石運貯軍前自去
年三月運到軍糧缺少令道員王全臣將原貯
糧散給復以羊給吐魯番官兵繼此運到軍糧
愈少又令王全臣購買米穀青稞及銀散給以
是自去年秋至今年夏軍糧無悞今巴里坤吐

魯番科舍圖鄂隆吉四處滿洲蒙古綠旗官兵
共二萬一千一百計從役共三萬三千四百九
十月需糧六千六百九十餘石自阿爾台遣往
官兵一萬二千計從役約二萬五千月需糧五
千石今年巴里坤布種青稞用籽粒二千石秋
成可獲糧二萬石吐魯番新墾之地收穫未可
預定今給吐魯番官兵糧自五月後不能接濟
已令協理將軍阿喇衲乘回人種地成熟於六

月初趣其收穫借給官兵俟糧到如數償還或以我兵在吐魯番種獲之糧補給庶可接濟議政大臣等議曰應如富寧安所奏惟吐魯番種地之處前議遣步兵五千防守今年若進兵至烏魯木齊令將軍等留兵防守若暫緩進兵則防守地畝有兵不可無馬請令將軍等將馬兵酌留兼備追勦侵犯賊人至軍糧足供與否亦令將軍富寧安查明議奏奏入

上從之

六月庚申

以總督鄂海副都統克什圖管理吐魯番墾地
事

靖逆將軍富寧安疏言吐魯番等處種地儲糧
為要在事大臣悉有乘機征勦之責請專派大
臣一人領其事奏入得

旨著交總督鄂海副都統克什圖一同管理若有軍務

等事照常遣用

乙丑

廕授藍翎達爾第喀等世職

吏部奏言正白旗藍翎達爾第喀鑲白旗護軍
校委署章京奔祿鑲紅旗護軍校委署章京吳
勒俱進藏至索羅木地界與賊戰陣亡當各授
為雲騎尉正藍旗藍翎委署前鋒章京查倫捕
進藏至喀喇烏蘇地界與賊戰射殪數賊被創

自盡當以陣亡例授雲騎尉悉令本旗以當襲
之人奏襲奏入得

旨依議查倫挿臨敵奮勇身故著給與騎都尉

秋七月甲申

議先給吐魯番軍糧

靖逆將軍富寧安疏言前將青稞糜米籽種運
至吐魯番給兵播種今據大定總兵官張宏印
呈報回人之田向於正月種植青稞糜子悉已

滋長我兵種植逾期今苗復被旱又據協理將
軍阿喇衲呈報籽種到遲未及播種作兵糧支
給伏思回人播種成熟可促令刈割借給官兵
俟糧到償還但必至八月收穫此時正須預給
吐魯番官兵當給糧米六分青稞麥四分今悉
以米運到運送六分之外其青稞麥四分請令
潼商道王全臣購買麥麵分給議政大臣等議
應如所奏至四川陝西總督年羹堯甘肅巡撫

綽奇疏言吐魯番駐兵地遠非巴里坤比請乘
炎熱草盛時多運糧積貯請即令總督年羹堯
等將起運之糧星夜飛輓奏入

上從之

乙未

分運軍營糧餉

靖逆將軍富寧安疏言前因大舉進剿當備裹
帶隨運糧二萬二千餘石至軍營但今月給兵

糧亦當及時運赴若一時並輓運費價銀亦同
給不特需費多且恐承運官領餉易溢今巴里
坤收駝悉肥壯又於喀爾喀購買駝至八月皆
肥以駝運糧甚便臣入奏即移川陝總督年羹
堯乘炎熱草盛時將月給兵糧如前速運軍營
至進勦裹帶隨運糧分起派官領運酌減運費
南路至哈密北路至圖古里克遣官防守俟年
羹堯文到即撥官兵以駝前赴哈密圖古里克

馱運軍糧至軍營收貯議政大臣等議如所奏
奏入

上從之

丙申

賚敘進藏從征官

吏部議曰從定西將軍噶爾弼進藏各官功列
一等者逾當遷之職一等即用其次以陞階即
用又其次在任官以陞階先用候補候選者以

本職先用奏入

上從之

丁酉

命都統圖喇屯守烏蘭古木等處

征西將軍祁里德疏言前移都統圖喇等令速
諭總理屯種事蘇永祖赴烏蘭古木等處平治
田畝開濬溝渠乘時播種復派委署前鋒統領
卜柱及扎薩克台吉根敦等統兵一千前赴烏

蘭古木度形勢立營伍以資防守隨據蘇永祖
呈報烏蘭古木一路地土肥饒水泉雖少儘可
引溉今農事已畢若撤軍還大營過冬俟來春
往為時稍遲不如以屯種五百官兵即於烏蘭
古木等處立營伍謹汛防乘農事畢引水入地
來春凍開及時播種可增開田畝又據扎薩克
台吉根敦等還報自喀爾奇喇之巴顏鄂博處
起至塔拉托羅海止共二百五十餘里設哨汛

七臣與都統圖喇等酌議如蘇永祖議屯種官
兵冬時不必撤還即駐烏蘭古木等處牧放馬
畜但屯地悉在哨汛以外賊人聞之或乘隙侵
擾請更派滿洲官兵及烏喇索倫科爾沁喀喇
沁喀爾喀官兵五百亦於烏蘭古木等處屯劄
彼此應援二營各設子母礮四派大臣一人統
轄官兵以時巡警有散秩大臣殷扎納願往任
事請令自効議政大臣等議如所請奏入得

旨殷扎納不堪著都統圖喇前往屯守

壬寅

命署西安布政使塔琳署四川巡撫色爾圖馳驛赴藏
四川陝西總督年羹堯疏言據駐西藏喇嘛楚
爾齊木臧布及西藏辦事知府石如金等呈報
在藏官兵不睦因公策旺諾爾布性委靡副都
統常齡侍讀學士滿都員外郎巴特瑪等任意
滋事謹將原文封奏若大兵未可即撤請令滿

都巴特瑪自備資斧由西寧邊外撤還若大兵
撤還當派官留藏偵探消息沿途仍設驛站以
速郵傳更於察木多設兵聲援以安達賴喇嘛
等衆議政大臣等議曰西藏被賊擾害蒙

聖主獨斷發兵征勦今藏地已定土伯特唐古忒等悉
賴拯救留兵防守乃年羹堯聽信喇嘛及知府
飾詞妄報阻撓毀謗將軍大臣擅請撤兵冒昧
殊甚請以年羹堯飭所司嚴議奏入得

旨侍讀學士滿都員外郎巴特瑪與知府石如金喇嘛
楚爾齊木臧布俱著由西寧一路前來滿都員缺著
署理西安布政使事塔琳往藏跟隨將軍印務効力
其在藏駐劄之四川綠旗兵丁恐其生事著署理巡
撫事務色爾圖進藏管轄在彼駐劄色爾圖塔琳著
年羹堯速行文令其馳驛前往四川巡撫員缺朕另
行補授至西安布政使事務著年羹堯舉伊所知
之人令其署理員外郎巴特瑪員缺行文大將軍將

彼處章京撥派一員即令速行進藏與公策旺諾爾
布一同辦事

壬子

預借從征官兵俸餉

靖逆將軍富寧安疏言接部文大兵移駐烏魯
木齊各營軍器馬匹是否足用令臣入奏今據
都統睦森副都統薩爾禪知勇甘肅提督路振
聲等報云所屬護軍驍騎綠旗兵一切軍器馬

匹皆足用又據副都統英柱常壽等呈報前襲擊吐魯番等處馬駝缺已將俸餉借抵購買補足以備進勦今二年餘汛防撥用馬駝又稍有缺仍於見支行糧之外借支庫銀購買補足以將來當給行糧償抵請如其議借支官兵銀十二萬六千九百九十五兩令其購買虧缺馬駝議政大臣等議曰應如富寧安所請令陝西巡撫噶什圖將銀如數解送軍營暫貯俟大兵進

勦借給購買留駐官兵不必借給如常收貯奏

入

上從之

九月乙酉

誥諭廷臣

上諭議政大臣等曰從前曾有以朕每年出口行圍勞苦軍士條奏者不知國家承平雖久豈可遂忘武備前噶爾丹攻破喀爾喀并侵擾我內地扎薩克至烏

蘭布通朕親統大兵征討噶爾丹敗走後又侵犯克爾倫朕統兵三路並進至招摩多勦滅之今策妄阿喇布坦無端侵犯哈密地方朕徵發阿爾台及巴里坤兩路兵進勦策妄阿喇布坦聞之心膽俱碎乃遣策零敦多卜等潛往西藏劫掠毀壞寺廟土伯特地方已被殘蠹朕又遣大兵前往擊敗策零敦多卜等復取西藏救土伯特於水火之中我兵直抵西藏立功絕域此皆朕平時不忘武備勤於訓練之所致也

若聽信從前條奏之言憚於勞苦不加訓練又何能
遠至萬里之外而滅賊立功乎爾等諸臣咸宜知之
臣等謹按王制著三田之禮周官垂四隙之
文蓋以習勞講武處無事而不忘有備也伏
惟

聖祖仁皇帝三駕親往

德威遐邇於運籌決策之中猶諄諄以平時不忘訓練
為誠用能招攜懲叛近則諸藩受庇遠則西

金史卷之八
卷十
藏吐魯番接踵底定成遠至邇安之

懋績我

皇上繩

武集勲無時不以覲揚

光烈為心是以

時巡所至

親閱戎行復歲舉

獮狩之典俾近臣禁旅莫不警宴安而嫺武備迨乎

命將出師

膚功迅奏為前古所未有良由遠近蕃部親見

六師震疊罔不悚息驚服不率者既大申撻伐來歸者皆願効前驅於此仰見

家法繩承訓行有素豈偶然哉

戊子

量撤守藏綠旗官兵

署理四川巡撫色爾圖疏言前西藏平定留兵

防守自打箭爐至拉里魯以四川綠旗土司番
兵共留三千五百餘名輓運糧餉今貯藏糧餉
足支二三年且藏地糧米購買可得不必重煩
輓運但自打箭爐至拉里設六十六站需兵防
守統計各站酌駐官兵更以土司番兵亦入數
中共需兵一千九百其餘一千六百若撤還則
糧亦可省議政大臣等議如所請奏入

上從之

冬十月辛未

增給科卜多烏蘭古木特里諸處農器并覈地畝穀數

征西將軍祁里德疏言據總理屯種事蘇永祖呈稱科卜多烏蘭古木特里諸處可種之地悉開乘時和開墾坤都倫河諸處可種之地亦悉開墾今年種麥所獲數倍往年來年更可添種但農器恐不足供乞早發給謹以所收麥麩令待

讀學士阿禮等恭齋呈

覽所資農器請令大同府知府購備奏入得

旨據所奏在科卜多烏蘭古木等處開墾耕種因土沃
水裕今年所得麥子一倍收有六倍爰請明年添種
千石及詢問齋呈麥麩之阿禮等據云科卜多烏蘭
古木地方廣濶開墾之處頗多原係厄魯特等耕種
好地今應將歉收之茂岱察罕度爾等處耕種入力
移至科卜多烏蘭古木耕種可以多收再種地所用

犁鋤鐮子鋤鋤等器每年給發不少何以一年之間
即俱損壞鐮鋤鋤鋤俱係鐵器軍前或難於備辦犁
係木器何地蔑有若隨伊所請槩行給發路途遙遠
著人送往頗費錢糧再軍前種地人員稟報所收糧
數一倍得有數倍等語甚不明晰應照內地或一畝
一晌收得米石若干如此稟報方得明晰其科卜多
烏蘭古木地方添種田畝所給犁鋤鋤等物之處
著議政大臣詳加議奏尋議用兵以軍儲為重種地

多則積貯亦多將軍祁里德奏今年種麥多收
請令來年於科卜多烏蘭古木及坤都倫河諸
處可耕之地以今年所收用為籽粒增種倘不
足用更以鄂勒錐圖郭勒等處所收糧給與增
種至茂岱察罕度爾種地歉收請以所用入力
器具悉移為科卜多烏蘭古木耕種之用茂岱
察罕度爾地分與發配罪人開墾至鐮鋤鍬
諸器皆須用鐵請勅部行文山西巡撫令即製

造購駝付侍讀學士阿禮等攜往秋收後以時
收貯所用之犂軍前有木可造令伊等自製更
行文將軍傳爾丹等將開墾地丈量頃畝計算
將糧及秋收糧數詳報今科卜多烏蘭古木有
種地兵及駐劄兵五百值農隙時令多伐林木
為修築大城及室廬倉廩之地奏入

上從之

平定準噶爾方略前編卷十

欽定四庫全書

史部

平定準噶爾方略前編卷十二

詳校官監察御史

臣孫家賢

通政使司副使

臣莫瞻菴覆勘

總校官進士

臣

朱鈐

校對官中書

臣

李斯咏

謄錄監生

臣

李亭植

欽定四庫全書

平定準噶爾方略前編卷十一

康熙六十一年冬十一月乙未

命撫遠大將軍王允禎馳驛赴京輔國公延信管理大將軍印務

上諭總理事務王大臣等曰西路軍務大將軍職任重
大十四阿哥允禎勢難暫離但遇

皇考大事伊若不來恐於心不安著速行文大將軍王

令與弘曙二人馳驛來京軍前事務甚屬緊要公延信著馳驛速赴甘州管理大將軍印務并行文總督年羹堯於西路軍務糧餉及地方諸事俱同延信管理年羹堯或駐肅州或至甘州辦理軍務或至西安辦理總督事務令其酌量奏聞至現在軍前大臣等職名一併繕寫進呈爾等會議具奏尋議曰應速行文大將軍王暫以印敕付平郡王訥爾素署理即與弘曙來京奏入得

旨副都統阿喇衲著隨大將軍王來京副都統阿林保著隨弘曙來京

辛亥

靖逆將軍富寧安奏報巴里坤等處屯田收穫青稞一萬五百七十石有奇

十二月戊辰

侍郎查克旦以罪罷留軍前効力

上諭議政大臣等曰大將軍王來時朕止令副都統阿

喇衲隨來弘曙令副都統阿林保隨來旨意甚明侍郎查克旦係叅贊大臣擅自違旨前來是何意見著議政大臣詢問明白具奏尋議曰查克旦違

旨私從軍前來京應革職枷責如例其輕車都尉世職應另請承襲奏入得

旨查克旦理應治罪但係

皇考簡用官至侍郎此數年軍務伊亦効力著革職留任並帶伊世職令其自備資斧速回軍前効力贖罪

行走

乙亥

喀爾喀哲卜尊丹巴胡土克圖率達什春丕勒
託音多爾濟託音至京恭弔

大行皇帝喪並獻駝馬納之

己卯

簡撤噶斯路駐守兵

上諭總理事務王大臣等曰噶斯遣兵駐劄特為防範

策妄阿喇布坦之人侵犯青海今噶斯一路官兵無事可將駐劄年久之人撤回其新往官兵內驗看漢仗好者移至巴里坤効力再量留兵丁駐防噶斯一路之處爾等詳議具奏尋議曰噶斯現駐滿洲綠旗兵一千六百八十七人應令將軍宗扎卜選兵五百暫於噶斯一路駐防餘兵並撤回所在貝勒塞卜騰扎爾盆蘇克旺扎爾達顏之子達什策零等駐守所在既與噶斯相近如用兵時令

伊等兵與青海西寧等處兵一同調遣奏入

上從之

雍正元年癸卯春正月辛巳朔壬辰

封青海台吉策凌棟羅卜為貝勒

上諭總理事務王大臣議政大臣等曰青海台吉策凌棟羅卜著封為貝勒自西陲用兵以來青海之王以下台吉以上各著勞績

皇考曾降旨俟凱旋之日再行計功今青海王台吉等

歷年効績作何加封施恩之處察明議叙具奏

丙申

上親弔哲卜尊丹巴胡土克圖遣使護其喪歸國

先是理藩院奏曰哲卜尊丹巴胡土克圖黃教
中第一流人也數世行善垂九十年當噶爾丹
叛時率七旗喀爾喀等來歸最有功其家世喀
爾喀汗之子土謝圖汗之弟遭逢

聖朝疊膺殊遇前年

聖祖仁皇帝面諭之曰歲癸卯朕年七十爾年九十是
年爾必來無食言胡土克圖承

旨還今遵

諭來京謁見

梓宮志願已遂泊然示寂請如達賴喇嘛班禪額爾德
尼例賜以名號印冊用示優典奏入得

旨給與名號印冊既而

上且臨弔喀爾喀圖謝圖汗等請勿往

上諭曰胡土克圖極蒙

皇考聖祖軫念禮遇加隆

皇考聖祖升遐係甲午日今胡土克圖圓寂亦係甲午

日佛果

聖因證明不昧胡土克圖非尋常僧人比朕躬親往懸
帕供茶以盡朕心將此旨傳與喀爾喀汗王額駙及
胡土克圖徒屬人等知之至是理藩院以送哲卜尊
丹巴胡土克圖龕座還請大臣等護行奏入

上特命敦郡王允祇世子弘晟齋賜印冊奠儀又

命散秩大臣尚崇廩等護龕座行所過蒙古部落禁止

騷擾需索

丙午

命傳諭策妄阿喇布坦使臣吹納木喀等

策妄阿喇布坦使臣吹納木喀等朝見

上命都統喇錫理藩院尚書特古忒傳諭曰爾國台吉

在我

聖祖皇考時雖有微勞亦多罪戾乃無故侵我哈密發
兵往招殺害拉藏毀壞佛教惟天子統御萬邦理宜
興師問罪我

聖祖皇考至仁如天但令陳兵邊境俟其深悔前非即
加恩寬宥並無意於殄滅爾國也其後哲卜尊丹巴
胡土克圖為策妄阿喇布坦再三求赦我

聖祖皇考追念舊日微勞又曲鑒胡土克圖老人懇款
之意允其所奏令遣使往諭待其伏罪自陳即降

恩旨今

聖祖皇考升遐朕繼承大寶胡土克圖老人遠來再為
奏請是以復遣使於爾若爾台吉即遣親信之人誠
懇陳辭朕即寬宥以寧爾土宇若冥頑不靈仍搆兵
端亦可明言其意如欲廣我

聖祖皇考之仁恩惟爾台吉欲振我

聖祖皇考之武烈亦惟爾台吉朕仰承丕緒行我軍威
爾台吉詎不稔知今胡土克圖大喇嘛又已圓寂從

此亦無有為爾台吉奏請者矣可作速定奪來奏若
仍前支吾則兵由爾起無與於朕也爾非專使故不
與爾勅書爾其謹識朕言一一往諭

二月壬子

命量撤各路官兵

上諭各路將軍等曰策妄阿喇布坦無故起釁用兵八
載兵丁甚屬勞苦從前雖將老弱者撤回今又歷一
二年矣夫兵不務多惟在精耳須將實堪効力者存

留足用裕其糧餉方有裨益現今爾等各處兵丁不
拘滿洲蒙古漢人擇其精練者存留軍營其年老殘
廢者於今年草青之時令其各回本處

丙辰

命駐柴達木將軍宗扎卜赴署大將軍延信軍効力都
統宗室西綸圖往柴達木辦理撤兵事務

庚午

命追擒察哈爾厄魯特佐領羅卜藏錫喇卜等

上諭理藩院曰據察哈爾總管諾爾布奏報察哈爾厄魯特佐領羅卜藏錫喇卜藍翎侍衛春丕勒等逃遁等語著作速傳知將軍等令其派兵各路要截捕擒再著喀爾喀蘇尼特嚴令各處哨汛追勦擒獲其現在厄魯特恐伊等妄生疑慮著一等侍衛達鼐郎中鄂賴前往照管俟將羅卜藏錫喇卜等擒獲之後再回京

乙亥

封賞青海王台吉等

總理事務王大臣等遵

旨議曰自西陲用兵以來青海王台吉等並効力應加
封賞親王羅卜藏丹津加俸銀二百兩緞五疋
郡王戴青和碩齊察罕丹津封親王貝勒額爾
德尼額爾克托克托鼐封郡王貝子巴爾珠爾
阿喇卜坦墨爾根戴青拉察卜封貝勒輔國公
噶爾丹達什敦多卜達什封鎮國公吹喇克諾

木齊亦封貝勒其貝勒阿喇卜坦溫布加俸銀一百兩公諾爾布彭蘇克加俸銀五十兩其餘率兵進藏及駐防噶斯柴達木人等應令各路將軍核實具奏分別加賞奏入

上從之

丙子

賞賚土默特蒙古

上諭總理事務王大臣等曰從前土默特因遷移臺站

殊為擾累伊等於用兵之際知係國家大事看守臺站毫無遲悞甚屬可憫除照例賞給米糧外應按人數再加恩賚此前往給賞之處或另委人員或即交與管理臺站人員辦理著議奏尋議曰土默特蒙古坐臺者人給銀五兩公鄂倫岱軍臺事竣可無往亦不必更遣人往其當給銀即令管理臺站人員辦理奏入

上從之

己卯

副將軍阿喇衲奏報羅卜淖爾回人等歸附

阿喇衲奏言羅卜淖爾所在回人古爾班等率
哈喇庫勒薩達克圖哈喇和碩三處戶口千餘
人輸誠投順奏入得

旨下部知之

三月甲申

命撤駐藏官兵

上諭總理事務王大臣等曰在藏之兵或撤回或於通藏之路駐劄及西寧所餘官兵撤回之處集議以聞尋議曰西藏所在以策妄阿喇布坦擾亂用申撻伐平藏之後留兵防護恐屯劄日久唐古忒等供應繁費應盡罷之察哈爾及額駙阿寶兵應令公策旺諾爾布都統武格阿寶等統之由西寧路還阿寶在軍年久令與策旺諾爾布等並來京其江寧杭州兵令副都統吳納哈率之

由雲南還四川綠旗兵令副將李現光率之由
打箭爐還至察木多為通藏大路應於四川綠
旗兵中選千人駐防令總督年羹堯於川陝總
兵副將中揀選管轄再阿里地屬扼要今康濟
鼎赴藏阿里一切無人辦理應令康濟鼎舉効
力者以

聞給與職銜協助防守再西寧有綠旗兵六千足以防
守其都統汪悟禮所率京師兵應撤還奏入得

旨額駙阿寶令其帶領兵馬前往游牧地方休息數日
再令來京餘如議行

川陝總督年羹堯條奏川省事宜

年羹堯疏奏一打箭爐外中渡河口為通西藏
要隘不可無兵彈壓請以分駐嵐州之化林協
守備移駐中渡建立土城令把總一人兵二百
人分防一保縣在大河南當土番出入隘口防
汛不可不增請撥威茂營千總一人率兵百人

移駐保縣以資防禦其應支月糧即以威州所徵糴糧就近支給一松潘口外各番部落不一而阿樹一處最要今止給以委牌暫令土目管理不足見信於羌番請給長官司職銜以資鈐束一建昌所屬越嶲衛地甚寥濶蠻獠往往出沒搶奪今僅設守備一人兵二百五十人實難分撥防禦請改設一遊擊現在守備即為中軍再增一千總一把總兵二百五十凡五百人分

防彈壓一金川土司之土舍莎羅奔嘗出兵羊
尙著有勤勞請給以安撫司職銜以分小金川
土司之勢一烏蒙土府地界最廣奸目達木等
自土司祿鼎乾既死輒逞克暴土舍祿鼎坤祿
為固願擒之以獻俟二人擒獻達木給以土職
各管其地一川省滿城營房有官生捐資蓋造
者請予議叙一川省軍前有武進士武舉等自
備鞍馬資糧効力者武進士請補守備武舉請

補千總兵部議均如所請奏入

上從之

己亥

命議叙喀爾喀王貝勒等追捕厄魯特遁逃者

上諭理藩院曰追勦厄魯特羅卜藏錫喇卜等之王貝

勒貝子公台吉大臣侍衛暨兵丁等一聞厄魯特潛

遁俱各奮力追勦賊衆斬獲無遺伊等皆因感戴

聖祖皇考仁恩為朕抒誠効力朕已深悉伊等忠誠甚

為欣悅凡効力之人著查明具奏朕將特加恩賚將此旨繕寫通行傳諭至緝賊身亡受傷之人一併查奏尋又

諭理藩院曰厄魯特春丕勒等逃遁蒙古人遇之俱各努力追擒伊等感激

皇考覆育深恩竭誠仰報朕覽奏章為之墮淚嘉歎不已將此旨繕寫發與達鼎令查明効力人等具奏毋使一人遺漏朕將加以特恩又

諭都統喇錫曰追擒逃遁厄魯特之効力人員已諭令
議叙其收管未曾逃遁厄魯特之人員亦著查明議
叙於是封喀爾喀貝勒旺扎爾為多羅郡王公策卜

登車木楚克納木扎爾為多羅貝勒追贈陣亡

蘇尼特台吉進達克為輔國公給察哈爾副總

管官額遜騎都尉世職護軍校多爾濟喀爾喀

塔布囊巴賽宰桑喀爾占巴圖爾雲騎尉世職

官兵等各賞卹有差其收輯厄魯特未逃者一

等侍衛塞卜騰藍翎侍衛納木扎等悉加賞賚
辛丑

蠲免陝西全省未完銀米豆草

上諭戶部曰陝省自軍興以來大兵駐劄運送糧餉供
支草豆無一不需民力

皇考每為軫念今當大沛恩膏子惠元元所有康熙六
十年以前陝西全省除借給籽種著該督撫查明定
議分年帶徵外其餘凡有民屯衛所實在未完銀米

豆草悉予蠲免倘有不肖官吏以虧空捏稱民欠濫
邀曠典者一經發覺罪在不赦該部作速行文毋得
遲留

夏五月庚子

命預籌青海事宜

上諭總理事務王大臣等曰青海台吉兄弟不睦儻邊
境有事大將軍延信駐劄甘州相隔遙遠朕特將一
切事務俱降旨交年羹堯辦理若有調遣軍兵動用

糧餉之處著防邊辦餉大臣及川陝雲南督撫提鎮等俱照年羹堯辦理邊疆事務斷不可貽誤并傳諭大將軍延信知之

撤布魯爾從征綠旗兵

布魯爾所在綠旗官兵從征者令山西大同總兵官馬覲伯撤回

六月庚戌

命加總兵銜李如栢總兵官韓良輔等赴年羹堯軍

上諭總理事務王大臣等曰三屯營副將李如栢著賜
總兵銜與天津總兵官韓良輔前往總督年羹堯處
聽用原任前鋒統領蘇丹原任都統噶爾弼俱賜原
銜令往年羹堯處効力贖罪蘇丹噶爾弼韓良輔李
如栢每人各賞內庫銀一千兩

庚申

赦免川陝續補駝馬價銀除額外徵收銀米

上諭戶部兵部曰朕惟治安天下欲兵民共得其所必

以敷恩減賦為要比年以來策妄阿喇布坦狂逞逆命發師致討四川陝西進藏官兵歷經險遠往返萬有餘里甚屬勞苦朕深憫念其倒斃馱載馬匹價銀及口外沿途與西藏留駐兵丁續補駝馬價銀著悉免追賠又西陲軍興以來民間急公趨事供應差役實厯朕懷聞陝西甘肅二屬各州縣衛所地丁銀兩每一錢額外徵收三釐米每斗額外徵收三合以為備荒之用此項徒有加賦之名而無賑濟之實著自

雍正元年始將額外徵收銀米永行停止如有舊欠亦悉予蠲除務俾均霑實惠以副朕篤念兵民至意

壬戌

署撫遠大將軍貝子延信奏報青海郡王額爾德尼額爾克托克托率其妻子來奔

延信奏言據青海郡王額爾德尼額爾克托克托來言羅卜藏丹津等率兵來侵交戰四次屬人多陣亡餘或逃散牲畜輒為所劫掠今率

妻子來奔求援臣令暫居蘇油口內奏入報

聞翼日又奏言青海公噶爾丹達什來甘州率弟台吉
鄂齊爾台吉阿旺達克巴率兵與貝勒阿喇卜
坦溫布等相拒師敗來奔臣令噶爾丹達什暫
與其叔額爾德尼額爾克托克托鼐同居奏入
報

聞

戊辰

命遷故青海貝子丹衷家屬於游牧舊處令親王察罕

丹津管轄其宰桑等舊著勤勞俟秋涼時來京

加賞

秋七月己卯

命駐劄西寧辦青海事務兵部左侍郎常授勸諭青海

上諭常授曰據貝子延信奏報親王羅卜藏丹津貝勒

盆蘇克旺扎爾等率兵四千搶奪王額爾德尼額爾

克托克托鼐等爾宜遣人勸阻令其和好若羅卜藏

丹津借此侵犯邊塞則不可不加懲治此事或爾親往和解或遣賢能官員喇嘛等往彼和解爾悉心籌畫與年羹堯商酌而行

丁亥

命各路將軍選舉官弁遇缺補用

副將軍阿喇衲疏言察哈爾兵現在行間者雖於軍前補用但軍前缺少其於本處員缺例不得補轉以未嘗効力或軍前撤還者補用為護

軍校驍騎校等揆諸情理似未允當議政大臣等議覆曰嗣後應令阿喇衲即所領察哈爾官兵中効力者核明咨送各旗遇察哈爾所在有缺請補至其缺久懸不便可揀選現在應用者

引

見暫令署理奏入得

旨自有策妄阿喇布坦之事已經八載凡出征之在京八旗及盛京黑龍江寧古塔西安右衛等處滿洲綠

旗官兵內有宣力行間分內應陞者若於各本處補授恐致懸缺不敷看守是以將現在之人揀選補授以致軍前効力官兵轉壅滯其陞遷之路著行文諸路將軍等於滿洲蒙古漢軍綠旗官員兵丁內有宣力行間分內應陞人等查明選舉在京者咨送該旗外省咨送各將軍綠旗咨送各該督撫提鎮嗣後遇伊等應陞缺出令該處即行題補至補授軍前之人其缺不便虛懸著該處即行揀選人員奏請委署其

補授之人若再陞轉此委署之人亦可得陞如此則
軍前効力人等既獲陞遷之路即各本處才力可用
人員亦不至於壅滯將此交兵部著徧行八旗諸路
將軍及外省將軍督撫提鎮等知悉

己丑

命署撫遠大將軍貝子延信慰諭額爾德尼額爾克托
克托鼐等

上諭延信曰爾移書與額爾德尼額爾克托克托鼐等

稱欽奉諭旨青海台吉皆係顧實汗之嫡孫自我朝
太宗皇帝時顧實汗與達賴喇嘛和好恭順効力至今
百年蒙我

皇考施以恩寵加封名號普加庇護後經策妄阿喇布
坦敗壞黃教圍困西藏殺害拉藏且復謀侵爾等於
是我

皇考遣發大兵同爾等送達賴喇嘛至藏振興黃教今
羅卜藏丹津無故稱兵以王等不入伊黨自相侵害

朕仰體

皇考卷念顧實汗子孫之意其罪未明尚不忍即加征討已遣侍郎常授往問羅卜藏丹津所行情事若羅卜藏丹津知罪悔過朕當定其是非和解爾衆仍令爾兄弟照舊居住青海如果羅卜藏丹津不遵朕旨侵犯邊塞豈可不遣兵征勦今王之屬下人等盡被搶擄窮困投至甘州朕聞之不勝惻然特遣郎中通智辦給王公并屬下人等廩餼牲畜令從豐厚王等

在彼安居不須憂慮朕斷不使爾等稍有拮据也可
如是往諭并譯蒙古文發往翼日延信奏言額爾德
尼額爾克托克托鼐之子阿喇卜濟索諾木達
什來言率兵與賊人交戰相拒六七日賊退率
兵五千及妻子共千餘口來投臣已遣赴額爾
德尼額爾克托克托鼐處居住奏入報

聞

丙午

諭飭自藏進口領兵大臣等

上諭大學士等曰藏地兵馬已撤計程將至內地從前統領兵馬之大臣怠忽者多縱兵橫行騷擾民人種種無恥之行朕所深知著嚴行該地方官並統領兵丁之大臣若不各自約束仍縱所屬兵丁跟役任意或前或後行走逞強搶奪肆無紀律地方官於何處拏獲即將該管官一併拘留該處請旨將統領之大臣從重治罪若地方大臣徇情隱蔽朕別有訪聞將

地方大臣官員一併治罪將此諭旨明白曉諭兵馬
經行各路軍民知悉

平定準噶爾方略前編卷十一